
ՊԱՅՔԱՐ ԿԱՍՊՅԱՆ ՆԱՎԹԻ
ԱՐՏԱՀԱՆՄԱՆ ՈՒՂԻՆԵՐԻ ՎԵՐԱՀՄԿՄԱՆ ՀԱՄԱՐ

ՄԱՆՎԵԼՅԱՆ Ա. Բ.

ԽՍՀՄ-ի քայքայումից հետո նավթով և գազով հարուստ Կենտրոնական Ասիան, Կասպյան տարածաշրջանը և դրանց դարպասներ համարվող Հարավային Կովկասը դարձան ռուս-ամերիկյան մրցակցության նոր թատերաբեմ: Դեպքերի նման զարգացումը լրիվ կանխատեսելի էր, քանի որ Եվրասիայի վերահսկման գաղափարը Արևմուտքում մշակվել էր դեռ XX դ. սկզբին¹, որպես այսպես կոչված *Heartland*-ի (որը պայմանականորեն կարելի է թարգմանել «սիրտ հող»-ի) տեսություն, և եկել էր ժամանակը այն իրագործելու համար: Մանավանդ Արևմուտքում և հատկապես ԱՄՆ-ում աճել էր քաղաքագետների, տեսաբանների և վերլուծաբանների մի ամբողջ սերունդ, որի համար բրիտանացի հայտնի տեսաբան, աշխարհագրագետ և պատմաբան Հալֆորդ Ջոն Մակինդերի *Heartland*-ի² տեսությունը դարձել էր սեղանի գիրք: Դեպի այս տարածաշրջան շարժվելու և այն վերահսկելու գաղափարը մշակում էին Սպիտակ տան արտաքին քաղաքականության վրա հզոր ազդեցություն ունեցող քաղաքագետներ և վերլուծաբաններ, ինչպես Զբիգնև Բժեզինսկին՝ իր հայտնի «Շախմատային մեծ խաղաղաշտ»³ գրքով, ԱՄՆ-ի փոխնախագահ Դիկ Չեյնիի ազգային անվտանգության հարցերով նախկին խորհրդական Լյուիս Լիբին, ԱՄՆ-ի պաշտպանության նախարարի նախկին տեղակալ Պոլ Վոլֆովիցը և այլն: Այսինքն՝ դեպի այս տարածաշրջան շարժվելու համար կար տեսական հիմք, որն ապացուցում և արդարացնում էր այդ քայլի անհրաժեշտությունը ԱՄՆ-ի՝ որպես թիվ 1 գերտերության էլ ավելի հզորացումն ապահովող և նոր գերտերությունների հայտնվելը կանխող հիմնավորում: Տարածաշրջանում գերակայություն հաստատելու համար առաջին հերթին անհրաժեշտ էր սեփական վերահսկողության տակ վերցնել հիմնական հումքային ռեսուրսը՝ նավթը, վերահսկել ոչ միայն դրա արդյունահանումը, այլ, որ ավելի կարևոր էր, արտահանումը:

Միջազգային հարաբերություններում ընդհանրապես և ԱՊՀ տարածաշրջանում մասնավորապես միջպետական կապերի զարգացման քաղաքականության մեջ գնալով է՛լ ավելի են կարևորվում էներգետիկ խնդիրները, որոնք ուղղակի տնտեսականից վաղուց արդեն վերածվել են քաղաքականի: Ուստի կարևորվում են ոչ միայն այն երկրները, որոնք ունեն նավթի կամ գազի որոշակի պաշարներ, այլև նրանք, որոնք վերահսկում են նավթա- և գազամուղները: Տարածաշրջանում

¹ Mackinder H. J., *The Geographical Pivot of History* (*The Geographical Journal*, December 1, 2004).

² Երկրորդ համաշխարհային պատերազմի տարիներին այս տեսությունը ակտիվորեն կիրառում էին ֆաշիստական Գերմանիայի տեսաբանները, մասնավորապես Քարլ Հաշովերը և Ֆրեդերիկ Բաթելը:

³ Bzezinski Z., *The Grand Chessboard*, New York, 1997.

թափ առնող Ռուսաստան-ԱՄՆ հակամարտության մեջ կարևորվում էր այն, թե ով կվերահսկի ոչ միայն նավթի և գազի արդյունահանումը, այլև դրանց արտահանման ուղիները⁴:

Էներգետիկ հնարավորությունները այն լրացուցիչ գործոնն են, որ որոշում ու թելադրում են քաղաքական զարգացումները թե՛ ԱՊՀ-ում և թե՛ համաշխարհային քաղաքական թատերաբեմում: Վերջին թանկացումները գազի բնագավառում, որին դիմեց Ռուսաստանը, հուշում են, որ ունենալով էներգետիկ այնպիսի հզոր լծակ, ինչպիսին է գազը, պաշտոնական Մոսկվան սկսում է նոր քաղաքական հարաբերություններ կառուցել ԱՊՀ երկրների հետ: Այսինքն՝ ոչ միայն զուտ տնտեսական, այլ նաև քաղաքական գործոնն է առկա, երբ Ռուսաստանը, առաջ մղելով էներգետիկ խնդիրը, փաստորեն ամրացնում է իր դիրքերը տարածաշրջանում: Սակայն եթե «գազային» քաղաքականությունը համեմատաբար նոր երեվույթ է մեր տարածաշրջանում, ապա նավթը վաղուց է օգտագործվում որպես «գենք», և այս բնագավառում նույնիսկ քաղաքական որոշակի փորձ է կուտակվել⁵: Հայաստանը գտնվում է կասպյան և միջինարևելյան նավթով և ընդհանրապես էներգետիկ պաշարներով հարուստ տարածաշրջաններին մոտ, ու այս մոտիկությունը, այսպես թե այնպես, ազդում է հարևան երկրների հետ թե՛ մեր հարաբերությունների ձևավորման և թե՛ մեր նկատմամբ նրանց կողմից տարվող քաղաքականության վրա: Նավթային գործոնը ձևավորում է նաև հարավկովկասյան և կասպյան տարածաշրջաններում ԱՄՆ-ի և ընդհանրապես տարածաշրջանով հետաքրքրվող տերությունների քաղաքականությունը: Այնպես որ այս տարածքներում էներգետիկայի արդյունահանման և դրանց արտահանման համար տերությունների միջև ընթացող սուր մրցակցությունը լավագույնս է ցույց տալիս Հարավային Կովկասի և Կասպից ծովի ավազանի երկրների նկատմամբ այդ տերությունների քաղաքականության իրական «արժեքը»: Այսինքն՝ տերությունների միջև այս անհաշտ մրցակցությանը ուշադիր հետևող տարածաշրջանային պետությունների համար կարեւոր են էներգետիկ գործոնի ազդեցությունը և հնարավորությունները ճիշտ գնահատելն ու օգտագործելը: Նկատենք, որ էներգետիկ խնդրի թե՛ գերազնահատումը և թե՛ թերազնահատումը հավասարապես վտանգավոր են տարածաշրջանում սեփական անվտանգության համակարգի կառուցման գործում: Եվ քանի որ «էներգետիկ անվտանգություն»⁶ հասկացությունը վաղուց արդեն զուտ տնտեսականից վերածվել է քաղաքականի, հետևաբար հարկավոր է բազմակողմանի և մանրակրկիտ ուսումնասիրություններ կատարել այդ անվտանգության մակարդակի բարձրացման հնարավորությունները ճշտելու համար: Մանավանդ որ ԱՊՀ տարածաշրջանում և մասնավորապես Հարավային Կովկասում ընթացող քաղաքական գործընթացների վրա էներգետիկ ազդեցու-

⁴ *U.S. Policy Toward the Caspian Region: Recommendations for the Bush Administration* Dr. Brenda Shaffer is Research Director of the Caspian Studies Program at Harvard University's http://bcsia.ksg.harvard.edu/publication.cfm?program=CORE&ctype=paper&item_id=109.

⁵ www.WashingtonProFile.com "Черное золото" для американских политиков", 20 апреля 2005.

⁶ www.iags.org/es.html, The Institute for the Analysis of Global Security (IAGS)/ Energy Security.

թյունները նոր որակներ են ձեռք բերում: Եթե 1990-ական թվականների սկզբին Կասպից ծովը, այսպես ասած, միջազգային նավթային շուկայի հետ կապում էին երկու հիմնական նավթամուղ՝ Բաքու-Նովոռոսիյսկը և Թենգիզ-Սամարան, ապա այսօր խողովակաշարերի թիվը հասնում է 7-ի⁷, որոնք սկիզբ են առնում Կասպից ծովի ափամերձ շրջաններից և ավարտվում տարբեր երկրների տարածքներում՝ կամ նավահանգիստներում, կամ էլ նավթավերամշակման գործարաններում: Երեք խողովակաշար սկսվում է Բաքվից և ավարտվում Նովոռոսիյսկ՝ Ռուսաստան, Սուփսա՝ Վրաստան, և Ջեյհան՝ Թուրքիա նավահանգստային քաղաքներում: Խողովակաշարերի առատությամբ Ադրբեյջանի հետ մրցակցում է Ղազախստանը⁸, որի նավթով հարուստ ափամերձ շրջաններից դուրս եկող երեք խողովակաշարերից մեկը գնում է դեպի նույն Նովոռոսիյսկ նավահանգիստ, երկրորդը՝ դեպի Սամարա (այս խողովակաշարով Ղազախստանը միանում է ռուսական խողովակաշարային ցանցին, ինչը հնարավորություն է տալիս այդ երկրի նավթը հասցնել Եվրոպա և Բալթիկ ծովի նավահանգիստները), իսկ երրորդ նավթամուղը Կասպից ծովի ղազախստանյան ափերը կապում է չինական Ալաշենկու քաղաքի հետ⁹ և նախատեսված է չինական նավթային շուկայի համար: Եվ, վերջապես, յոթերորդը իրանական Նիկա-Ռեյ խողովակաշարն է, որը շահագործման հանձնվեց 2005 թ.: Այս զարգացումներից և խողովակաշարային պայքարից իսկ կարելի է նկատել, որ ԱՄՆ-ի կողմից ռազմավարական համարված Բաքու-Ջեյհանը, ի տարբերություն անցած դարի 90-ականի, ներկայումս լուրջ մրցակիցներ ունի, և խնդիրը ոչ այնքան բուն նավթն է, որքան կառուցվող նավթամուղների միջոցով ազդեցության պահպանումը և ուժեղացումը: Հետևաբար, բացառված չէ նոր նավթամուղների կառուցումը, որտեղ գերակա է քաղաքական, այլ ոչ թե տնտեսական գործոնը:

Բաքու-Ջեյհան խողովակաշարին տնտեսական գրավչություն տալու համար Վաշինգտոնը կարևորում է Ղազախստանի միացումը այս ծրագրին¹⁰: 2005 թ. մարտին Ալիև-կրտսերը Աստանա կատարած իր այցի ժամանակ արժևորեց կառուցվող խողովակաշարով ղազախական նավթի արտահանման հարցի քննարկումը: Ընդհանուր առմամբ հավանություն տալով այդ ծրագրին՝ Նախագահ Ն. Նազարբաևը այն դիտում է որպես ընդամենը այլընտրանքային և ոչ հիմնական ուղի՝ սեփական նավթը արտահանելու համար: Ղազախստանի պետական նավթային ընկերության՝ «Կազմունայգազի» նախագահը հայտարարեց, որ պատրաստ են տարեկան 6-8 մլն տոննա նավթ արտահանել Բաքու-Ջեյհանով, և եթե սրան էլ գումարենք Ադրբեյջանի արտահանման ողջ հզորությունը, որը տարեկան կազմում է մոտ 15 մլն տոննա, ապա լավագույն դեպքում նավթամուղը կաշխատի իր

⁷ Бахшиян К., Трубопровод как новый политический фактор в регионе Южного Кавказа (Голос Армении, 2.IX.2004).

⁸ www.Neftegaz.ru, Захарова Т., Нефтепровод, рожденный политикой.

⁹ Гавричев С., Каспийская поднебесная: Китай становится в регионе перспективным инвестором и партнером, www.RusEnergy.

¹⁰ www.Росбалт.ру, 03/10/2005, Главная лента 09:39 Назарбаев: Через Баку-Тбилиси-Джейхан пойдет казахстанская нефть.

հզորության 40-50%-ով: Սա նշանակում է, որ տեսանելի ապագայում խողովակաշարը չի կարող փակել շինարարության համար ծախսված գումարները: Այս փաստը հասկանալով՝ խողովակաշարի տերերը փորձեցին նախագծի մեջ ընդգրկել Ռուսաստանին, սակայն նաև ամերիկյան բանագնացների, և՛ նույնիսկ Ալիև-կրտսերի ու Սահակաշվիլու մոսկովյան այցերը մեկ անգամ ևս փաստեցին, որ Ռուսաստանը ընդգծված սառնությամբ է վերաբերվում ծրագրին: Մոսկվայում արձագանքի չարժանացավ նաև Սահակաշվիլու առաջարկը՝ Նովոռոսիյսկ քաղաքից կառուցել լրացուցիչ նավթամուղ, որը կմիանա Բաքու-Ջեյհանին¹¹:

Նավթամուղի արդյունավետությանը անսպասելիորեն սկսել է սպառնալ Չինաստանը, որի արագ տեմպերով աճող շուկան էներգակիրների նորանոր պաշարների կարիք ունի: Արդեն ավարտվել են Ղազախստան-Չինաստան նավթամուղի կառուցման աշխատանքները: 3000 կմ երկարությամբ նավթամուղը կասպյան ավազանը կապելու է Չինաստանին: Նշենք, որ չինական շուկան անցած տարի սպառել է մոտ 127 մլն տոննա նավթ. այս ցուցանիշով վերջինս զիջում է միայն ԱՄՆ-ին¹²: Եվ այսպես, դեպի Չինաստան կառուցվող նավթամուղը լուրջ մրցակից է Բաքու-Ջեյհանին, և 2006 թ. ղազախաչինական նավթամուղի շահագործումից հետո ղազախական նավթը կարող է ամբողջովին փոխել իր ուղղությունը՝ հոսելով դեպի Չինաստան: Այս պայմաններում, առանց ղազախական նավթի, Բաքու-Ջեյհանը կարող է դառնալ թանկարժեք մետաղե ջարդոն:

Նավթամուղի արդյունավետ շահագործմանը սկսել է սպառնալ նաև իրանական Նիկա-Ռեյ նավթամուղը, որը Կասպից ծովի ափին գտնվող իրանական Նիկա նավահանգիստը կապում է Թեհրանին մերձակա նավթավերամշակման գործարանին: Ներկայումս խողովակաշարի թողարկման հզորությունը կազմում է 8.5 մլն տոննա, սակայն նախագծային հզորությունը 25 մլն տոննա է: Այս ծրագրի համաձայն՝ Իրանը կասպյան ավազանի երկրներից է վերցնում նավթ, որը նրան անհրաժեշտ է երկրի հյուսիսային տարածքների կարիքների համար, դրա փոխարեն վերջիններիս նավթ է տրամադրում Պարսից ծոցի իր նավթահանքերից: Այս ծրագրով Իրանը ազատվում է երկրի հարավից նավթը հյուսիս տանելու ծախսերից, իսկ ավազանի երկրները՝ նավթը միջազգային շուկա հանելու թանկ և դժվարին խնդիրներից: Այս քայլով Իրանը ավազանի երկրների համար բացում է արագ տեմպերով աճող ասիական շուկայի դռները: Ծրագրի նկատմամբ արդեն հետաքրքրություն են ցուցաբերել Ղազախստանը, ռուսական ու թուրքմենական կողմերը:

Բաքու-Ջեյհանին որոշակիորեն սպառնում է նաև Քիրքուկ (Իրաք)-Ջեյհան նավթամուղը, որի վերականգնման աշխատանքները ավարտվել են, ու դրանով

¹¹ *www.ng.ru, Независимая газета, Российские чиновники и бизнесмены не спешат откликаться на призывы президента Грузии Михаила Саакашвили о дружбе.*

¹² *Statistical Review of World Energy* <http://www.bp.com/subsection.do?categoryId=9003064&contentId=7005874>.

իրաքյան բարձրորակ և էժան նավթը կարող է հոսել դեպի միջերկրածովյան նավահանգիստ: Այս պայմաններում հարց է առաջանում, թե մասնավոր գնորդը ո՞ր նավթը կնախընտրի՝ թանկ կասայա՞նը, թե՞ էժան ու որակյալ արաբականը¹³:

Հաջորդ սպառնալիքը Ռուսաստանի հովանավորությամբ կառուցվող Բոսֆոր և Դարդանեղ նեղուցները շրջանցող Բուրգաս (Բուլղարիա)- Ալեքսանդրապոլիս (Հունաստան) նավթամուղն է, որի շինարարության վերաբերյալ համաձայնագիրը Աթենքում կնքվեց 2005 թ. մարտին Ռուսաստանի նախագահ Պուտինի այցի ժամանակ, իսկ նույն թվականի մայիսին արդեն Մոսկվայում հունական և բուլղարական կողմերի հետ համատեղ ստեղծվեց նավթային կոնսորցիում, որը կգրադվի նավթամուղի շինարարությամբ¹⁴: Սա նշանակում է, որ «ռուսական» նավթը կկարողանա շրջանցել «թուրքական» արգելքը, այսինքն՝ Բոսֆոր և Դարդանեղ նեղուցները, և Էգեյան ծովով կհայտնվի «միջազգային շուկայում»:

Ի՞նչն է սպառնում նավթամուղի արդյունավետ շահագործմանը: Ինչքա՞ն նավթ կա Կասպից ծովի ավազանում և մասնավորապես Ադրբեյջանի ափամերձ շրջանում: 1990-ական թվականներին, երբ կասպյան ավազանի երկրները անկախություն ստացան, սկսվեցին լայնածավալ *PR* ակցիաներ, որոնց նպատակն էր համոզել աշխարհին և, առաջին հերթին, նավթ սպառող երկրներին, որ սա նոր Պարսից ծոց է: Այն ժամանակ միջազգային տարբեր լրատվամիջոցներ նշում էին, որ տարածաշրջանը տիրապետում է համաշխարհային նավթի պաշարների 27%-ին, ավելի ուշ այս թիվը իջեցվեց մինչև 7%-ի: Սակայն անգամ այս տվյալները հերքվում էին մասնագետների կողմից: Նկատենք, որ Կասպից ծովի ափամերձ շրջանների երկրաբանական քարտեզները գտնվում էին Մոսկվայում, և նույնիսկ Կասպից ծովի ավազանի երկրների իշխանությունները չունեին ածխաջրածնի իրենց իրական պաշարների լիակատար պատկերը: Սակայն այս փաստը վերջիններիս չէր խանգարում գոնե թղթի վրա մրցակցել Պարսից ծոցի երկրների հետ: Միայն տարիներ անց՝ երկարատև ուսումնասիրություններից և մեծ հիասթափություններից հետո, պարզ դարձավ, որ տարածաշրջանը չի տիրապետում նավթի քիչ թե շատ լուրջ պաշարների, ինչը կարող էր կարևորել այդ երկրների դերը համաշխարհային նավթային շուկայում, հետևաբար նաև համաշխարհային քաղաքական քարտեզում: Ըստ Բրիթիշ Փեթրոլեում ընկերության *“Statistical Review of World Energy”* հանդեսի՝ կասպյան ողջ տարածաշրջանի նավթի պաշարները կազմում են համաշխարհային նավթի մոտ 3.2%-ը¹⁵: Այս պաշարների 0.6%-ը կամ մոտ 7 մլրդ բարելը կենտրոնացած է Ադրբեյջանի, իսկ մոտ 0.8%-ը (սա ամենամեծ փայաբաժինն է տարածաշրջանի երկրների մեջ)՝ Ղազախստանի ափամերձ շրջաններում: Համեմատության համար ասենք, որ փոքրիկ Քուվեյթը տիրապե-

¹³ Вяземская О., МИЭП МГИМО. Проблемы и перспективы взаимоотношений ОПЕК и России. <http://neft.tatcenter.ru/analytics/?page=5>.

¹⁴ Боков М., “Роснефть” не скупится. Госкомпания готова проинвестировать трубопровод Бургас-Александруполис, www.Rus_Energy.com.

¹⁵ Statistical Review of World Energy (<http://www.bp.com/subsection.do?categoryId=9003-064&contentId=7005874>).

տում է համաշխարհային նավթի մոտ 8.4%-ին¹⁶, ավելի շատ, քան Կասպից ծովի ափամերձ շրջաններից նավթ արդյունահանող երկրները միասին վերցրած: Այսինքն, նավթային լուրջ պաշարների ու առավել ևս համաշխարհային նավթային շուկայում այդ պաշարների միջոցով քաղաքական ազդեցության ուժեղացման մասին խոսելը լուրջ չէ: Ներկայումս ողջ տարածաշրջանը նավթի արտահանման ծավալներով ապահովում է համաշխարհային նավթի սպառման ընդամենը 0.8%-ը, և միայն 2010 թ. այն կարող է հասնել 1%-ի: Նորից համեմատելով *OPEC*-ի անդամ երկրների հետ՝ նկատենք, որ վերջիններս ապահովում են համաշխարհային սպառման շուկայի 35-ից 40%-ը¹⁷: Տարածաշրջանը թիվ մեկ գերտերությանը՝ ԱՄՆ-ին, հետաքրքրում է ոչ այնքան նավթի պաշարների, որքան այդ նավթի միջոցով սեփական ազդեցության ուժեղացման տեսակետից: Նավթը ընդամենը միջոց է, որը Վաշինգտոնին թույլ է տալիս վերահսկողություն սահմանել թե՛ Հարավային Կովկասի և թե՛ Կասպից ծովի ու Կենտրոնական Ասիայի երկրների նկատմամբ: Հենց այս տեսանկյունից էլ պետք է դիտել նաև Բաքու-Ջեյհան նավթամուղի կառուցման ծրագիրը: Այսինքն՝ Վաշինգտոնին այն առաջին հերթին հարկավոր է տարածաշրջանի նավթային հոսքերը վերահսկելու և դրա միջոցով կախվածությունը ուժեղացնելու իրենից: Բաքու-Ջեյհանը ոչ միայն թույլ է տալիս դուրս գալ Կասպից ծով, այլ, առաջին հերթին, ըստ ամերիկյան «ռազմավարների»¹⁸, հնարավորություն է ընձեռում այդ նավթամուղին կապել Ադրբեյջանի, Ղազախստանի, հետագայում նաև Թուրքմենստանի ու Ուզբեկստանի նավթային տնտեսությունները: Իսկ քանի որ այս երկրները ոչինչ չունեն աշխարհին առաջարկելու, բացի նավթից ու գազից, ԱՄՆ-ը փորձում է անել հնարավորը այդ պետությունների տնտեսության հիմնական ու թերևս միակ ճյուղը՝ նավթարդյունաբերությունը, դնել իր լիակատար վերահսկողության տակ՝ գլոբալ մասշտաբով վերահսկողություն սահմանել ոչ միայն նավթի արդյունահանման, այլ նաև տեղափոխման վրա: Եվ այս առումով, Բաքու-Ջեյհանը Վաշինգտոնի համար անփոխարինելի է և ռազմավարական նշանակություն ունի: Սակայն այս ծրագրերը հնարավոր կլինի իրականացնել այն դեպքում, եթե ոչ միայն ադրբեյջանական, այլ նաև կասպյան ավազանի ու Կենտրոնական Ասիայի մյուս երկրների նավթը հոսի այս խողովակաշարով: Մինչ օրս միայն Ղազախստանն է խոստացել իր նավթի որոշակի քանակը ուղղել դեպի Բաքու¹⁹, սակայն այս խոստումը առայժմ ամրագրված չէ միջպետական վերջնական պայմանագրով. սրա մասին կան միայն կնքված նախնական պայմանավորվածություններ և հուշագրեր: Պետք է հաշվի առնել նաև այն, որ Ղազախստանը նավթի առաքման մասին երկարատև պայմանագրեր ունի Ռուսաստանի և Չինաստանի հետ: Հետևաբար, նա լուրջ խնդիրներ կունենա դեպի Բաքու-Ջեյհան

¹⁶ Նույն տեղում:

¹⁷ <http://www.opec.org/home/PowerPoint/Downstream%20Constraints/OPECDownstreamexplains.htm>.

¹⁸ Dr. Brenda Shaffer is Research Director of the Caspian Studies Program at Harvard University. *U.S. Policy Toward the Caspian Region: Recommendations for the Bush Administration; July 2001. 1.*

¹⁹ Гавричев С., www.RusEnergy.com. Золотая четверть. Казахстан определился, с кем и какие части Каспия будет осваивать. Дата публикации: 7 апреля 2006 г.

նավթի առաքման հարցում: Բացի այդ, Ղազախստանի նավթի արտահանման հզորությունը տարեկան կազմում է ընդամենը 45 մլն տոննա, և քանի դեռ Կաշդանյան նավթահորից նավթ չի սկսել արդյունահանվել, անիմաստ է սպասել ղազախական նավթի լուրջ պաշարների հայտնվելուն Բաքու-Ջեյհան նավթամուղում:

Եվ այսպես, թե՛ Հարավային Կովկասում և թե՛ կասպյան ավազանի երկրներում միջպետական հարաբերություններում կարևորվում է նավթային գործոնը: Ե՛վ նավթի արդյունահանման, և՛ վերջինիս արտահանման համար ընթացող պայքարը, որին, բացի տարածաշրջանի երկրներից, ակտիվորեն մասնակցում են ԱՄՆ-ը, Եվրամիությունը, Չինաստանը, «նպաստում» է այդ երկրների միջև հարաբերությունների ձևավորմանը: Նավթային պաշարները և Կասպից ծովի կարգավիճակին առնչվող պայքարը լուրջ տարաձայնություններ է առաջացնում Ադրբեջանի, Ղազախստանի, Թուրքմենստանի և Իրանի միջև²⁰: Վերջիններս չեն կարողանում ընդհանուր հայտարարի գալ ոչ միայն ծովի կարգավիճակի հարցում, այլ նաև այս կամ այն նավթահանքի պատկանելության խնդրում: Ադրբեջանը, Իրանը և Թուրքմենստանը մինչ օրս վիճարկում են մի շարք հանքավայրերի պատկանելության հարցը²¹: Կասպից ծովը մինչ օրս չունի միջազգայնորեն ճանաչված կարգավիճակ. փաստացի գործում է ԽՍՀՄ-ի և Իրանի միջև կարգավիճակի մասին 1940 թ. կնքված պայմանագիրը: Այս փաստաթղթի բացակայությունն էլ նպաստում է հանքավայրերի պատկանելության վերաբերյալ վեճի ուժեղացմանը: Ղազախստանի և Ադրբեջանի հետ Ռուսաստանի կնքած առանձին պայմանագրերը ոչ թե նպաստում, այլ, ընդհակառակը, սրում են հարաբերությունները Կասպից ծովի ավազանում²²: Սա էլ, իր հերթին, հանգում է ավազանի երկրների կողմից սեփական ռազմական նավատորմների ուժեղացման քաղաքականությամբ, ինչը խթանում է Կասպից ծովի ռազմականացումը և ռազմական նոր մրցավազը²³: Նկատենք, որ այս վերջին գործընթացը տեղի է ունենում ԱՄՆ-ի ակտիվ աջակցության պայմաններում, որը զինում է թե՛ Ադրբեջանի և թե՛ Ղազախստանի նավատորմները: Հասկանալի է, որ այս գործընթացից փորձում են հետ չմնալ Իրանը և Թուրքմենստանը: Սակայն Կասպից ծովում ռազմածովային գերիշխանության առումով Ռուսաստանը առայժմ մրցակիցներ չունի:

Հարավային Կովկասի պետությունները Արևմուտքին և հատկապես ԱՄՆ-ին հետաքրքրում են որպես իրենց համար ռազմավարական նշանակություն ունեցող տարածաշրջան՝ Կենտրոնական Ասիա դուրս գալու կարևորագույն ճանապարհ: Այս առումով, Արևմուտքի համար կարևոր է Հարավային Կովկասում կայունության պահպանման խնդիրը: Հետևա-

²⁰ Сеп С., Как обойти Иран? Обратитесь к Азербайджану "The Jerusalem Post", Израиль, 10 июня 2005 г.

²¹ Заславский И., www.REGNUM.ru, Баку-Тбилиси-Джейхан: Трудности (трубо) перевода.

²² Бутаев А. М., Каспий: зачем он Западу? <http://www.caspiy.net/>.

²³ Richter P., *The Struggle for Caspian Oil, the Crisis in Russia and the Breakup of the Commonwealth of Independent States*. 1 July, 1999, <http://www.wsos.org/articles/1999/jul1999/rus-j01.shtml>.

բար, ցանկացած կտրուկ գործողություն, ինչը կարող է սպառնալ տարածաշրջանի կայունությանը, անընդունելի է Արևմուտքի և հատկապես ԱՄՆ-ի համար: Վերջիններս շահագրգռված են տարածաշրջանում ցանկացած գնով կայունության պահպանման համար: Այս իրավիճակն էլ, իր հերթին, ազդում է տարածաշրջանի երկրների միջև հարաբերությունների հաստատման գործընթացի վրա: Վերջիններս չեն կարող իրենց հարաբերությունները կարգավորել՝ առանց հաշվի առնելու նավթային գործոնը և դրա շուրջ գերտերությունների միջև ընթացող պայքարը: Ստեղծվել է մի իրավիճակ, երբ հարևան երկրները միմյանց հետ հարաբերությունները կառուցում են՝ ստիպված լինելով հաշվի առնել տերությունների շահերը: Սա էլ, իր հերթին, ազդում է թե՛ տարածաշրջանային ինտեգրման գործընթացների և թե՛ այստեղ առկա հակասությունների ու հակամարտությունների վերաբերյալ ընթացող բանակցությունների վրա:

Այսպիսով, կարող ենք եզրակացնել, որ էներգետիկ խնդիրները և դրանց շուրջ տերությունների ուժեղացող մրցակցությունը բացասաբար են ազդում թե՛ Հարավային Կովկասում և թե՛ Կասպից ծովի ավազանում ու Կենտրոնական Ասիայում պետությունների միջև առկա խնդիրների լուծման և բնականոն հարաբերությունների հաստատման վրա:

БОРЬБА ЗА ПРАВО КОНТРОЛЯ НАД ЭКСПОРТОМ КАСПИЙСКОЙ НЕФТИ

МАНВЕЛЯН А. Б.

Резюме

Контроль каспийских нефтяных потоков обусловлен стремлением установить политическое господство в регионе. Именно наличием политического фактора была продиктована необходимость строительства нефтепровода “Баку-Тбилиси-Джейхан” (БТД), посредством которого Соединенные Штаты хотят осуществлять контроль над каспийскими государствами: Азербайджаном, Казахстаном, Туркменистаном. США планируют воздействовать на прикаспийские нефтяные государства с тем, чтобы принудить их к транспортировке нефтяных ресурсов с помощью трубопровода “БТД”, тем самым контролируя нефтяные потоки. В развернувшейся борьбе вокруг каспийской нефти кроме России и США активно участвуют Китай и Иран. Вокруг Каспийского моря на данном этапе действуют и строятся еще семь нефтепроводов, которые могут серьезно осложнить функционирование “БТД”, что противоречит интересам США в регионе. Данный регион, не обладая серьезными нефтяными ресурсами (всего 3.2 % мирового запаса), исходя из политических соображений, в первую очередь интересуется США. Укрепив свои позиции на Южном Кавказе и в Каспийском регионе, США в дальнейшем получат возможность осуществлять экономический и политический контроль в государствах Центральной и Южной Азии.